

# 跳樓自殺的人會不會在落地前感到後悔？

文：23820000

排：oi

一年容易又開學，大家睇到依篇文嘅時候，應該差唔多開學又或者已經開咗學了。上一個學年係不幸嘅，意外地不斷有學生選擇咗以輕生結束佢地寶貴嘅生命。小編唔討論佢地選擇輕生係唔定係錯，因為小編到依一刻都只係睇到打緊文，最多都只係會俾庄員鬧吓小編遲交稿、正廢柴、食便啦、請食飯之類嘅東東，小編唔會明白到佢地生前面對嘅係幾大嘅壓力，所以小編冇資格去話佢地自殺就係浪費生命。

但係小編唔係話你壓力大就可以自殺呀，你諗都咪諗呀，老土啲講句：「死，係解決唔到問題的。」；不過「在特定情況下，自殺是否可接受」依條老生常談嘅問題暫時都唔重要，因為小編今次想講嘅係：

## 跳樓自殺的人會不會在落地前感到後悔？

哈哈哈哈哈，當小編一見到依條問題果陣時，真係勁想知道答案。不過好可惜，小編心諗到依一刻為止，依個世界都應該冇幾個人答到依條問題，所以如果小編要拎依條問題打一篇文，小編只可以不斷係下文講啲九唔搭八嘅嘢，如果大家唔想睇、完全冇自殺傾向，就可以飛去下一頁了，飛之前剪低小編個筆名入落電話，可能他朝會有用呢（唔一定係你用…）

-----我係分隔線-----

**「如果下落嘅時間長到能夠讓人來得及後悔，那麼可以推測，下落的高度足以讓後悔變得毫無意義」**

有人係咁回答的，好有趣嘅一個答案，亦都係諷刺的、絕望的。以正常人嘅身體構造加上腦部運算速度，假設係一樓跳落地，應該唔會夠時間後悔嘅，依個係小編嘅親身經歷，大概二十層樓內都應該唔夠時間後悔掛掛掛掛…我諗。除非你有路飛咁嘅橡膠身體，仲可以吹脹自己，慢慢飄落黎啦，如果真係嘅咁小編我冇好講啦，真係比你吹脹。

如果由再高嘅樓層下落嘅時間真係容許人黎得切後悔，我諗起碼都要三十層以上掛，依個高度飛落去，一定變硬肉醬啦。於是，後悔就真係變得毫無意義，當你後悔嗰陣時，發覺自己後悔得太遲，實在太可悲了。

不過唔緊要，身為頭腦聰明兼貼心嘅小編，已經諗咗解決嘅方法了。





Arthur Schopenhauer (警告你咪問佢係邊位呀，因為小編都唔識，就算小編答你都係嘍wiki抄番黎，你再問小編就打你，小編真係會打你架)曾經講過，唯一可接受嘅自殺方法是自行餓死。原因在於，只有餓死係一個緩慢而持久嘅過程，係依個過程中，如果你諗通咗，你唔想死了，隨時可以停落黎。依種情況下唔理最終有冇死，你嘅身體行為同你嘅意志都係統一嘅。但係對於割腕、跳樓、臥軌等自殺方法黎講，都係一瞬間嘅事，譬如跳樓跳到一半你突然諗通咗，但係一切都黎唔切喇。依條命就丟得太可惜。身體同意志相背離，即所謂嘅身不由己，無論幾時都係個悲劇。自殺有太多種情況係由於一時衝動、唔冷靜。依個時候應該俾啲時間自己、同時俾愛你嘅人一啲時間。

小編就唔信想自殺嘅你想自殺嘅意志強到可以做到 **長時間唔食嘢而餓死自己**

，有可能，絕對有可能，肚餓好辛苦，特別係半夜肚餓、又喺youtube見到人拍煮嘢食嘅片果陣。哈哈，咁你就一定死唔成了，hehe。

-----我係分隔線-----

正所謂「小明冇希望，前路冇得看」，你又唔係小明，你有希望就咪學人諗自殺啦。

同埋聽聞自殺嘅人嘅靈魂會留係原地，直至陽壽已盡為止先有得投胎，先唔好理係真係假，如果係真的話，死咗之後要喺同一個地方望同一樣嘅風景做同一樣嘅嘢幾十年，唉，真係諗起都想死，唔想死都悶到死。

原本小編仲諗住搵啲跳樓死嘅人嘅死狀比大家睇吓，嚇到你地唔夠膽自殺，不過都係咪啦，睇完以後唔想食肉醬意粉，本《嶺南人》又變埋18+，小編實又俾人鬧一獲金。

最後要同大家講嘅就係，睇到最尾嘅各位，比幾分薄面，請把「嶺南跳樓自殺第一人」嘅名號留比小編，如果你想自殺，唔該搵小編我講番一聲先。

但係小編唔會同你講小編我係邊個，如果你想知，加入編委會啦，有緣再見，88。

肯定又有人話邊個想你係邊個，誰tmd注意之類…唔緊要，總之你唔好自殺就得，最好入埋編委會做小編下庄就最好了。

